

Wanita mampu cipta kelainan perkenal produk pelancongan, warisan dan budaya

Jun 2, 2024 @ 9:51am



Peserta wanita Setiu dalam program pemeraksanaan Wanita Melalui Produk Pelancongan Budaya dan Warisan anjuran UMT, baru-baru ini.

KUALA LUMPUR: Peranan wanita dalam pengembangan produk pelancongan yang berkaitan dengan budaya dan warisan perlu diberikan perhatian kerana mereka berpotensi mencipta kelainan serta keunikan dalam bidang itu.

Pada masa sama, peranan wanita mampu menjadi platform penting dalam memperkuat mereka dalam ekonomi serta meningkatkan kesejahteraan masyarakat.

Malah, mereka juga mampu menjaga, memelihara dan menyebarkan warisan budaya serta kekayaan sejarah.

Misalnya, di Setiu, Terengganu dapat dilihat beberapa aktiviti budaya dan warisan yang diasaskan wanita di sekitar daerah itu dikenal pasti ketika program Pemeraksanaan Wanita Melalui Produk Pelancongan Budaya dan Warisan anjuran Universiti Malaysia Terengganu (UMT).

Pensyarah Kanan Jabatan Bahasa dan Komunikasi, Pusat Pendidikan Asas dan Lanjutan UMT, Dr Isma Rosila Ismail, berkata berdasarkan pemerhatiannya, wanita terbabit dalam pembuatan kraf tradisional seperti anyaman lekor, tikar dan atap nipah serta masakan tempatan sebenarnya mampu membuka peluang mereka mencipta produk pelancongan unik dan menarik.

"Inisiatif ini memungkinkan wanita di sekitar Setiu untuk mengambil bahagian secara langsung dalam ekonomi tempatan.

"Keupayaan wanita menjadi pengurus penginapan rumah inap sama ada secara tradisional (rumah kayu) atau moden tidaklah dinafikan.

"Dengan menyediakan pengalaman penginapan yang unik, mesra keluarga dan patuh syariah, wanita tidak hanya dapat meningkatkan pendapatan keluarga, tetapi juga menyumbang kepada pembangunan pelancongan sambil memelihara warisan budaya.

Promosi budaya, warisan setempat

Katanya, kesempatan bertemu dan mendekati wanita gigih ini memberikan banyak idea dan inspirasi kepada pasukan penyelidik untuk menyumbang kepada komuniti setempat terutama wanita.

"Melalui program beberapa bengkel diatur pasukan penyelidik UMT antaranya Bengkel Asas Aplikasi Canva, Bengkel Model Kanvas Perniagaan, Bengkel Eksplorasi Terapi Seni: Kenali Personaliti serta Sesi Perkongsian Pengalaman berkolaborasi dengan pusat interaktif budaya bertempat di Teluk Ketapang, Kuala Terengganu.

"Justeru, pemindahan ilmu dan penyampaian maklumat dari pasukan penyelidik kepada kumpulan wanita ini dapat dimanfaatkan untuk memberikan mereka inspirasi, kekuatan dalam memperkasakan lagi produk budaya dan warisan di Setiu," katanya.

Melalui program itu juga, beberapa perbincangan diadakan dengan peserta dalam menggariskan peluang untuk membangunkan pakej sesuai dengan produk budaya dan warisan mereka.

"Penyediaan pakej sesuai dihasilkan membolehkan wanita Setiu menjalankan perniagaan yang memberi impak positif kepada komuniti setempat sambil mempromosikan budaya dan warisan.

"Akses wanita kepada peluang dalam sektor itu juga dapat diluaskan. Latihan seperti latihan kemahiran, akses kepada sumber kewangan, serta isu budaya dan sosial yang mungkin membatasi penyertaan mereka perlu diberikan perhatian sewajarnya," katanya